

A cedeiresa praia da Magdalena foi o centro dunha celebración que durou todo o día

Máis dunha ducia de parellas selaron o seu amor a medianoite na Festa do Lugnasad

REDACCIÓN > FERROL

■ Á marxe dos requisitos legais, para casar hai rituais para tódolos gustos e cores. En Cedeira cumpriuse onte, preto da medianoite, cun dos máis orixinais: a versión celta. Trátase de facer unha festa inspirada no Lugnasad (unha das máis importantes para esta cultura) e, collendo elementos da cultura tradicional galega, así como de lendas da saga artúrica, artellar unha fermosa cerimonia que hai que repetir cada ano.

Na praia da Magdalena casaron deste xeito unha quincena de parellas, baixo a condución do druída Manuel Aneiros Loureiro, organizador da festa, co patrocinio do Concello de Cedeira e dos comercios e veciños. Estas vodas están baseadas na liberdade e o respecto mutuo entre os sexos. Ademais, é tamén unha celebración da fertilidade, polo que se levan adiante os baños de nove ondas e se toma a queimada, símbolo da unión entre o lume (o home) e a augardente (a muller).

Lanzarote e Xenebra inspiran tamén un ritual que comezou ás once da noite, despois de todo un día de actividades.

Desfile > A Festa do Lugnasad comezou xa o xoves e o venres coa montaxe dos toldos e cabanas dos diferentes clans (había nove inscritos). Desde primeiras horas da mañá de hoxe, os celtas ultimaban tódolos preparativos no poboado, situado na praia da Magdalena, entre a área de recreo e San Cidre.

Ó mediodía comezou un desfile ó que se uniron as parellas casadeiras, os clans e os músicos e colaboradores. Todos eles, vestidos de época, dirixíronse cara a praza Roxa e entregaron ás autoridades locais o estandarte da festa. O baile dos nenos de Buxainas abriu



As parellas prepararon durante toda a xornada a súa voda, que se celebrou pola noite

JORGE MEIS



O druída encárgase de conducir toda a cerimonia

J.M.

paso ó xantar, que cada clan preparou nas súas tendas do poboado celta.

Ás catro, tódolos participantes no Lugnasad volveron reunirse para pasar a tarde. Os nenos con-

vertéronse durante uns minutos en cabaleiros do rei Arturo á procura do Santo Grial, nun divertido xogo.

Logo da entrega do premio ó clan mellor ambientado comezaron as actuacións musicais co grupo acústico-vocal Asoaxe e o acordeonista Xavier, Buxainas e a banda Robaleira.

As vodas celtas celebrábanse ata o de agora, en Galicia, en Bretoña (Lugo), ata onde se desprazaban cada ano numerosas parellas para anovar os seus votos. Cedeira súmase así a un ritual que medra cada ano en interese. Proba diso é que para esta primeira edición apuntáronse quince parellas de noivos. A maioría eran galegas pero habíaas tamén doutros lugares da Península.

Os veciños de Magalofes e Radiofusión convocan un concurso de fotografía

REDACCIÓN > FERROL

■ Coincidindo coa celebración da XIX Festa do Cabalo de Magalofes, a asociación veciñal e Radiofusión convocan un concurso de fotografía. É a segunda edición dun certame centrado precisamente no mundo equino.

O xurado estará composto por dúas persoas da entidade veciñal e unha da emisora radiofónica. O primeiro premio consistirá nunha cea e hospedaxe dunha noite para dúas persoas nunha casa de turismo rural en Miño. O segundo clasificado recibirá unha caixa de

botellas e, o terceiro, un lote de produtos delicatessen.

As persoas interesadas en participar deben enviar as súas imaxes ó correo electrónico dirección@radiofusión.eu.

Retransmisión > A emisora Radiofusión informa ademais de que esta mañá realizará un programa especial desde o campo das Queiras. Será entre as doce do mediodía e as dúas da tarde. Nel analizarán o contido desta festa que tódolos anos congrega en Fene a milleiros de persoas.

O programa da Festa do Cabalo comeza ás 10.30 horas co concurso de beleza e estampa. A proba de arrastre está prevista para as 12.30 horas. Xa pola tarde celebrarase a proba de andadura galega e a de trotóns.

Como novidade, este ano haberá unha exhibición de doma de alta escola e de doma vaqueira, para seguir co concurso de enganches e cun dos momentos máis espectaculares da xornada: as carreiras. Ás 19.30 celébranse a de cabalos cruzados e a de cabalos do país.

breves

Covas despide as propostas do verán cun desfile de carrozas

■ O intenso verán que promoveron os veciños de Covas remata hoxe cun desfile de carrozas. Polo menos media ducia delas saíran ás once da mañá á estrada para ir desde o cuarteliño ata Santa Comba. Alí, ás tres da tarde, entréganse os premios e celébrase unha comida campestre (gratuita para os participantes no desfile). Ás seis da tarde haberá xogos. O fin de festa está previsto para as oito. Ademais, na capela de Santa Comba hai programada unha misa para as 18.30 horas.

Proxectan a comedia "Delirious" en Ferrol e na alameda ortegana

■ Steve Buscemi, Michael Pitt, Alison Lohman e Gina Gershon protagonizan "Delirious", unha comedia que gañou a Cuncha de Prata ó mellor filme e o premio ó mellor guión no Festival de Cine de San Sebastián no 2006. Tom Dicillo dirixe este filme, que se poderá ver por partida dobre, esta noite, en Ferrolterra. Así, ás nove da noite proxéctase na alameda de Ortigueira. En caso de que chova, trasladarase o acto ó teatro. Tamén Ferrol gozará con esta película. Neste caso, a proxección comezará ás dez da noite, na praza do mercado da Magdalena. Se chove, será no interior da nave provisional. A actividade forma parte do ciclo "Noites de cine" que promove a Deputación da Coruña cos concellos da provincia.

Aventura e fantasía na película que se poderá ver pola noite en Cedeira

■ O ciclo "Noites de Cine" leva a Cedeira a película "A brúxula dorada". Proxectarase ó aire libre, na praza do Sagrado Corazón, a partir das 22.30 horas. Se chove trasladarase ó auditorio municipal. O filme conta as aventuras dunha nena nun mundo cheo de raras criaturas. Daniel Craig e Nicole Kidman están no reparto.

Coa fin de "Mapping Journeys" remata o ciclo "O Jofre fóra de si"

■ A última sesión do proxecto "Mapping Journeys", de Louisa Merino, que comezará ás sete no Torrente Ballester, pon fin ó programa "O Jofre fóra de si", que se desenvolveu durante agosto.